
PRIJEDLOG
Bosanski jezik

INFORMACIJA
O PROVOĐENJU PREPORUČENIH MJERA U UVJETIMA
EKSTREMNO VISOKIH TEMPERATURA

Cilj Informacije je upoznavanje članova Vlade Federacije Bosne i Hercegovine o mjerama koje poduzima Federalno ministarstvo zdravstva u saradnji sa Zavodom za javno zdravstvo Federacije Bosne i Hercegovine u uvjetima ekstremno visokih temperatura, a u skladu s odredbama Zakona o zdravstvenoj zaštiti („Službene novine Federacije BiH“, br. 46/10 i 75/13).

Zbog ekstremno visokih temperatura koje su zahvatile teritoriju Federacije BiH te koje kontinuirano negativno utječu na zdravlje stanovništva, a posebno hroničnih bolesnika, trudnica, djece, radnika koji rade na otvorenom, ali i zdravih mladih ljudi koji veliki dio dana provode na ulicama, kao i radno-aktivno stanovništvo, Federalno ministarstvo zdravstva ocjenjuje da je, s ciljem smanjenja rizika za zdravlje stanovništva u navedenim uvjetima, potrebno poduzeti sljedeće preporučene mjere:

- Da radno vrijeme na nivou primarne zdravstvene zaštite i specijalističko-konsultativnih službi počinje u 07.00 ujutro.
- Da se prioritet kod ostvarivanja usluga zdravstvene zaštite pruži hroničnim bolesnicima, maloj djeci, trudnicama i osobama starijim od 65 godina.
- Da roditelji koji dovode djecu na vakcinaciju protiv zaraznih bolesti, to učine najkasnije do 10:00 sati ujutro.
- Da poslodavci uposlenima koji obavljaju poslove na otvorenom prostoru početak radnog vremena pomjere na 06:00 ujutro. Ako tehnologija posla to ne dozvoljava treba razmotriti mogućnost da poslovi u periodu od 11 do 18 sati budu prekinuti i nastavljeni poslije 18 sati. Radno vrijeme se može skratiti srazmjerno štetnom utjecaju uvjeta rada na zdravlje i radnu sposobnost radnika. Preporuka je da se uposlenim hroničnim bolesnicima u ovom periodu omogući korištenje godišnjeg odmora. Poslodavci bi trebali dozvoliti i ležernije odijevanje uposlenika u ustanovama, poduzećima i tijelima vlasti, kao i ležernije odijevanje na oficijelnim događajima.
- Ustanove koje s radom počinju u 09:00 da početak radnog vremena pomjere na 08:00 sati.
- Općine bi na određenim lokacijama trebale osigurati besplatnu podjelu vode za piće.
- U slučaju dugih čekanja na graničnim prijelazima potrebno je osigurati podjelu vode i drugih napitaka.
- Da se stanovništvo kontinuirano izvještava o općim mjerama zaštite od visokih temperatura (izbjegavanje kretanja od 10 do 17 sati, nošenje široke svijetle odjeće, upotreba šešira i naočala, uzimanje dovoljnih količina tečnosti, konzumiranje voća i povrća, osobe koje putuju da prave češće odmore i češće uzimaju manje količine tečnosti itd.).
- Da se savjetuje stanovništvu boravak u rashlađenim i klimatiziranim prostorijama, ali da se pri tome vodi računa da razlika u temperaturi između prostorija i vanjskog prostora ne bude veća od 5^o stepeni Celzijusa.

Federalno ministarstvo zdravstva će o provođenju ovih mjera obavijestiti i kantonalna ministarstva zdravstva, a radi osiguranja provođenja gore navedenih mjera na području kantona, odnosno organiziranja načina pružanja zdravstvene zaštite kao i funkcioniranja

zdravstvenih ustanova u uvjetima ekstremno visokih temperatura. Imajući u vidu navedeno predlažem da Vlada Federacije BiH, nakon razmatranja ove informacije, usvoji sljedeće

ZAKLJUČKE

1. Usvaja se Informacija o provođenju preporučenih mjera u uvjetima ekstremno visokih temperatura.
2. Podržava se provođenje preporučenih mjera u uvjetima ekstremno visokih temperatura u zdravstvenim ustanovama na cijelom teritoriju Federacije BiH.
3. Zadužuje se Federalno ministarstvo zdravstva da u saradnji sa kantonalnim ministarstvima zdravstva i zavodima za javno zdravstvo u Federaciji Bosne i Hercegovine prati provođenje preporučenih mjera.
4. Zadužuju se resorna federalna ministarstva da svako u okviru svojih nadležnosti utvrdi preporučene mjere u uvjetima ekstremno visokih temperatura i naloži njihovo provođenje na nižim nivoima vlasti.